

Di dos anochi di Festival Infantil "Un Canto pa Aruba su Himno y Bandera"

Awe mi ta skirbi riba e di dos anochi di e festival infantil "Un Canto na Aruba su himno y bandera," edad 10 pa 12, presenta den Centro di Bario Tanki Leendert diasabra anochi.

Upgrade Music a habri acompañaando **Priscilla Quandt** cu e tumba "Subi caya ban celebr'e" y por a pensa mes ora cu e anochi lo tin competencia, ya cu **Priscilla** a duna un presentacion fuerte.

Tipico Alegre Kadushi Largo seguidamente a acompaña **Melixa Werleman** cu e danza "Nos dushi Aruba". E coro tabata poco debil na comienzo y a mehora despues pero no a logra scapa punto pa e cantante. **Melixa** a haci bunita esfuerso pa sali bon for di e cancion pero no a logra e puntonan necesario.

Los Hermanos tabata tin dos cantante pa compañía. E prome tabata **Zyqu Guerrero** cu e wals "Historia di nos bieu-nan". El a conta historia di nos agricultornan antes, plantamento i-cunucu y con nos

grandinan a lucha a nos pais y a pidi respet pa e grandinan y pa nos traha duro pa un bon futuro. Su cancion tabata un pa a tene cuenta cune.

Kayla Arends a sigui cu "Mi bandera bula" cu tabata danza di **Elton Trimon**.

Kayla a presenta cu cancion masha bunita pero e problema tabata cu na comienzo di frasenan e tabata perde palabra locual a perhudica su puntuacion. El a keda si como un cantante cu e publico lo kier sigui mira den e festivalnan aki.

Cu **Tipico Folklor** a presenta e cantante **Zaina Falconi**. Su cancion "Nos hendenan feliz" tabata un danza bunita, pero e voz di e cantante aki tambe ta impresionante. El a trompeca na dado momento cu su letran an pero a demostra di por bini bek y termina fuerte. E sigur ta un cantante cu den futuro lo yega leu cu e voz bunita cu e tin.

Esun cu a sorprendemi tabata **Robert Maduro Jr.** Mi tin varios aña ta sigui e hoben aki no como "ecopia" di su tata pero buscando su talento verdadero. Pero diasabra anochi ta prome biaha cu mi a mire como un artista subiend e trapi, **Robert** a canta e wals "Mi stima Aruba" y a impresiona cu e voz cu e tin y con el a domina esaki. E tabata sigur un di esnan cu tabata destina pa termina den e mihonan e anochi aki.

Cu **Alma folklorico** tambe a canta **Cassidy Cordero** cu a interpreta e tumba "Nos ta riba un isla bendiciona." El a haci tur lo posibel pa duna lo mihor cu por pero no a logra e puntonan necesario pa termina entre



e mihonan di e anochi. **Grupo Stimami** tabata tin solamente un cantante pa compañía y esaki tabata **Izellah Ruiz**. Na comienzo mi a bisa mi mes "esaki no ta **Izellah**" pero despues a ripara cu su voz tabata hees. A pesar di esey el a demostra di por capta su publico cu su wals inteligente y Orguyoso y a logra un final bunita. **Tipico Poco Loco** cu den e añanan di su existencia a bira hopi popular, a cuminsa cu "Aruba mi pais stima" canta pa **Edelienne Colina**. Por a



ripara cu **Edelienne** no tabata mucho sigur di su mes, sinembargo a haci tur esfuerso pa brinda lo mihor pero no a termina den puntuacion halto.

Esun si cu a logra mas tabata **Eshlaine Pannefleek** cu su wals "Aruba", y haciendo un recorrido den nos fauna cu **Kwihi**, **Watapana**, **Aloe**, **Kibrahacha** florea entre otro. **Eshlaine** a demostra cu den futuro, buske, pasobra e ta creciendo musicalmente y a termina e anochi tambe na di 3 lugar.

Agrupacion Melodia a sigui acompañaando dos cantante. E prome tabata **Cindy Erasmus**. Manera el a cuminsa cu "awe m'a lanta bon trempa" mi a sinti cu mester scucha e resto. Ki bunita el a presenta su wals "Lanta, para y canta" y na final e aplauso tabata tambe di lanta, para y aplaudi pa e cantante aki cu a habri caminda pa tene cuenta cune ora su number wordo menciona den mas festival. E tabata fuerte candidata a premiacion na e momentonan ey pero no a logra puntonan necesario pa esaki.

Despues tabata chens di **Kayla Villasmil** cu a canta su danza

"nos ta canta Aruba awe". El a canta su isla, su bandera, su himno, pidi pa wak nos hubentud, traha y siña duro, pero su mala suerte pa puntuacion tabata sinta den articulacion y corta palabra. Su voz ta hopi bunita y nos lo sigui mire tambe den futuro pasobra e ta creciendo.

Tipico Macuarima a cera e anochi cu 4 cantante. **Kassandra Petrocchi** a habri cu wals "Canta Aruba". No por keda si menciona e bunita cu su voz ta y e bunita cu e cancion tabata tambe. **Kassandra** sinembargo no a cay den premiacionnan. Pero e lo bolbe sigur.

Steve Geerman a sigui despues cu su wals-danza di **Doodle Sophia**. Mi ta corda cu for di e ultimo festival cu el a presenta aden mi a expresa cu mester tene cuenta cu e hoben aki pasobra e ta bin tuma over cu e voz cu e tin. Diasabra anochi el a demostra esey cu su cancion. El a mantene e compas hopi bon y su voz tabata e voz di e prome dos anochinan. Scuchando **Steve** bo por a sinti cu e festival ta bayendo den su direccion. El a bin termina na prome lugar cu un cancion dificil y na mes momento hopi bunita.

Kaythleen Semeleer a sigui despues cu "Aruba ta nos cas". **Kaythleen** a haci esfuerso grandi pa impone sinembargo e puntuacionnan no a cay na su favor a pesar di a duna bunita presentacion.

Brandon Rincón a cera e anochi cu e tumba, "E barco yama Aruba". Di **Brandon** tur hende tabata sa cu e ta briya den su presentacionnan y e es-

pectativa tabata kico e lo haci e anochi aki. E showman di e festivalnan a sobresali un biaha mas pidiendo **Papa Dios** pa tuma e timon pa guia Aruba.

Brandon tabata figura grandi pa sigur termina entre e mihonan di e anochi, y a bin termina na di dos lugar tras di su compañero cantante di emes grupo, **Steve Geerman**. Den dos anochi **Tipico Macuarima** a pone 3 di e seis ganadornan na su number, faltando ainda e di tres anochi cu ta di e hubenilnan di 13 pa 17 aña.

Juby Naar.

